

黃鵠山人詩初鈔

序

以文字爲文字性情之用不出焉於文字求文字
運不入焉詩有其本夫人而知之矣知之而卒難言之然
而有境焉非苦無以爲甘也非逆無以爲順也非幽無以
爲顯也非離無以爲合也性情神明之發寄於境而境非
性情神明之精也水之流也因地成形水不知也流焉而
已雲之出也因風作勢雲不知也出焉而已抑亦思其鬱
積磅礴於未有水未有雲之先者果何如乎予嘗與顥叔
登大華引領鴻濛稗糠塵世然側足焦原未嘗不動色相
誠顥叔第默不語旣過則談笑自若乃歎顥叔能制心予

不及其勇又嘗同登牛頭山杜子美祠子與閬鄉張聽庵
先至少焉見穎叔策一騎駿馱出林中聽庵故善騎子因
問穎叔騎法若何聽庵曰能自遂夫能制心者體也能自
遂者才也是將經緯九天衽席萬古引河漢而上挾星辰
而下無不可者何論於詩穎叔歷官四十年所至有聲夫
詩特其緒餘耳且其詩之工且多一時魁人傑士無不怵
服而欽佩之蓋無俟予言而其慘淡變化於其體製固結
不可解於其胸臆穎叔自歷而自會之予又不能言第以
穎叔去秦藩卽編詩屬予作敘予以所學旣不逮且不欲
爲苟同負此宿諾殆餘十年矣夫子與穎叔相知之深有

在文字外者雖文字不盡言而予又不容不言穎叔復出以不忍負其民而忽失其官嗟乎穎叔之官則失矣而穎叔之詩自在也刻之於江甯未竟也歸來出以相示嗟乎天果欲以詩人終穎叔耶不知天愛詩耶抑其愛穎叔耶
光緒壬午秋謝章鋌序

序

京師人文薈集之盛道咸聞而已微壬子癸丑間與張子海門孫子琴西者遊而閩林子穎叔交尤親歲時清嘉職事休暇四人者蓋未嘗日月不詩酒爲樂也海門先去典學湘中琴西亦遂出爲守則余與君乃時索居嘗謂詩者樂之遺也傳曰禮樂不可斯須去身又曰升高能賦可爲大夫夫古今詩雖有不同其本之性情而可達政事罔或異也穎叔豪宕磊落之才一斂之於佩玉瓊琚開納眾有與時消息其志高而意和故其時雖彌斂而氣特昌跌宕益奇記昔浣園日偶番休君嘗策馬挾其鄉人徧遊西山

碧雲潭柘諸寺同人皆不及知歸則出詩寸許盛發揮其
泉壤之奇或於其閒慷慨憑弔雄深妙遠使人畢然有以
高瞻而遠矚於是君詩蓋極其盛而且成矣乃出樞直歷
臺諫不數年閒再遷京兆丞尹出藩關中關中方厄兵燹
之餘遺黎赤地百度蕩然論者謂君又將以其所爲詩者
發之事業以濟時艱蓋其本之性情而可達政事者有素
然也而君殷然乞序其詩且問所處久未以爲吾其何以
報君乎哉獨嘗與君同直最久君輩前余而退然撫謙若
獨後者迴思禁近羽檄旁午銀倉暮警日旣盡而腕且脫
光景如在目前君旣出余將歸序君之詩恍然昔者周廬

風雨晨夕百端舉不勝其追憶而今惟獨詩之存者是則
余之讀君詩爲之反覆不能置也同治三年夏五月王拯
序

自序

水次之民聞蓬萊可至習水性發船累年月蕩乎大澤而無崖波濤震駭幾覆焉划而息清溪淺瀨忽萬灘雷動妄臆奇觀逆而上港斷舵折牽曳久之不能自挽陸處者笑之夫非不自悔也歲久荒其故居以水爲家矣以步以輿以馬而閭井而城市坦夷易安奚以險阻爲殆有性焉過涉滅頂耶懸流而鳬游耶習之未至耶抑天耶而不繫於人耶余於詩嘗貽陸處者之笑矣顧自少壯至衰老祇自道其憂患之所閱歷往者翁子蕙卿張子海門王子少鶴孫子琴西謬以爲可少鶴旣爲之序頃歲貽書有阿辭焉

彼數子者殆同有水癖耶其所涉之淺深夷險同耶不同耶髮脫齒豁亡精喪魄海內故人生死契闊無由商故業眇者不忘視跛者不忘履其於視與履果何如耶大河前橫吾怖焉莊生有云終身役役而不見其成功繭然疲役而不知所歸其有膠漆纏索以引我者將抱牘以正之同治十一年壬申秋九月林壽圖自序

黃鵠山人詩初鈔卷一

閩縣 林壽圖

古今體詩五十六首

贈耕者

甲午

公卿罔辨菽與麥恥貪天功自食力壟上不謀天下事駟
馬高蓋何煊赫前耕後饁婦從夫教兒護雞兼讀書書中
略識堯舜字已覺世界追皇初龙吠無聞作復息夜寐魂
清勞得逸出門萬象娛我心杲杲東方初出日

贈許次史茂才

賡

騎鹿下人間見此旌陽愧同關令尹望氣得邂逅綠髮

猶少年道骨抱靈壽問子致何術嬾與世緣邁結茅近武
彝雲疊眾峯皺屋椽插銀漢簷滴挂綫溜時攜枕椰杖往
與蛟龍鬪上捫碧落碑天書異篆籀四圍山木合九曲秋
雨逗子規勸不歸聲碎令人瘦世固乏仙才子獨顧我厚
笑張媧皇絃醉作釣天奏孳孳雞鳴起射者偶中覆枯骸
詎霑名萬古俄刻漏鍊魄御神尻洗癰去懸瘤天梯在方
寸邀約翔宇宙

大水紀事

波濤夜掀牀起視堂浮芥呼童急索履化鳧弄狡獪牀前
黃耳犬迎作江豚拜家真空四壁天闊我眼界東鄰聞牆

傾西舍報屋壞恍逢昆陽鬪萬瓦震一敗誰負水衡錢盡
償河伯償水勢遠漲天轉使大海隘雨腳垂長繩繫日不
出曬鳩與鵲爭能勃谿聲逞怪十室九無煙蛛網釜上挂
浮鷗且時來盍載麥舟賣驚呼海盜至連櫓嚴列械厯劫
又甲兵貽患非癰疥縣官令甲下府帖戶丁派頗聞逐魚
鼈猶愈刈菅蒯家家門鍵失日日刁斗戒書生學水戰申
諭及髻髻屬垣語鄰翁夜警各警欬吾有老瓦盆聊用抵
鼓鞀任卹重古風危傾切情話飢溺痛由已守望慎勿懈
端陽擬寒食何處懸蒲艾欲弔楚大夫恐傷母年邁離騷
亦罷讀問天色爲晦惜無銅弩手三千射溟海

鑑亭荷花開呈陳葦仁先生

壽祺

講堂坐春風炎夏不知暑開軒面水檻落霞沒煙嶼淩波
曉出浴火雲訝初煮不濡亦不熱炎官奈何汝中含西方
意微笑佛無語博山引旃檀幽意澹如縷湔浣塵土腸銅
瓶正過雨起喚十丈船華嶽在牖戶

呈姚石甫先生

瑩

少賤習江湖貽蕩適天性寵讓鶴乘軒文謝雞舞鏡鳬鷗
眞吾侶失魚亦恥競忘機非避世倨野類未敬誰設鐘鼓
饗欲代爰居慶君侯鵷鸞姿宰邑逐臬獍破訟歸詩書一
柔制萬勁樵薪尤愛護芹藻樂游泳蒐獮及下材嫁嫡必

遣媿虞人已赴招貧女敢卻聘文章末技耳貴有活國政
側聞調四時在挈北斗柄除書儻行取例往職諫諍正聲
振中朝舞韶別雅鄭期扶四海輪不以一士病衡門歌太
平未妨老蓬鬢

同石甫先生夜泛臺江

耒陽百里治小邑昔居高才龐鳳雛今有漳南賢令尹眼
空天下友吾徒秋江小艇月初滿對岸青山雲可呼明日
督郵身到縣公庭羅雀訟全無

食西施舌

海國霜清煮酒嘗不知吳越昔興亡五湖思載鴟夷去夜

聽潮聲廣舌長

雨泊 乙未

飄泊亦良得蒼茫晚繫艘百蟲繁夜雨萬木冷秋江長物
扁舟短孤盃對影雙煙波迷處所遠火獨漁缸

題秦少游論書帖後

曲木之蔭無直陰袞幅之衣無正襟書家作態政類爾古
有端士嚴步履淮海筆精得妙理腕動心能左右以不令
駢枝生拇指側鋒未數臨江王宕勢無取襄陽米玉環飛
燕總輕狂辭輦當軒儼儀止蘇門祇有黃豫章騏驎竝轡
高騰驤惜哉墨汁如金不輕瀉銀鉤摹勒今無價

贈張亨甫丈

際亮

春風母萬類靈蠢同胚胎秋風葬百卉神鬼棄不材溫肅
其一噫用舍胡相乖造物固至仁嫗煦非所懷蘭因煎膏
焚桂以伐薪摧抱質詎不美遭俗容未諧上古寶太璞世
器傳尊罍乘化不減度商以置子才

子才隘九州獨出遲無對收視洞萬古道在方寸內巧工
騁手技媚女爭睂黛混沌鑿窾窾玲瓏紛破碎小黠必大
癡旦氣昏於晦抑搔不識癢安得鞭其背同處羿彀中卻
弓且斂退務爲江海游意豈輕闌闌

闌闌市日中已有雞鳴興萬蓋擎秋荷踏日猶履冰西風

忽夜嘯葉落收凍蠅鬼鴟奪爾肉攫去如神鷹出城見南山正色肅無朋連雲接帝座初旭懸觚棱宮觀勢隱起上有仙佛憑吐棄煙火食凡軀謝不能子誓躋其巔萬里搏鵬鵬罔顧斥鷃笑蓬蒿亦飛騰

飛騰望延津憶訪豐城劒塵匣千古埋風雲一會欠扁舟見雙龍空悲昔人占宿蘊霸王略恥藉翰墨薦篋中二三策心誅無義戰管樂生非時海內用兵厭縫掖章甫冠巍然謬壇坫危言綴瘡疣薄俗難鍼砭念子誰前蔽我猶坐昏墊歲月惜輪蹄隔戶老鉛槧

鉛槧抱尺寸傳者已積薪蠹魚不得仙箕斗安能神名場

集枯矢射鵠志君臣文字張虛弓匪關道屈伸先民導寶
筏吾黨謬知津燃藜夜見聖日月天再新補亡撥秦燼歌
雅編周豳昨過酒家飲訕笑傾路人驂騑有匹亞以子開
風塵光怪且勿銜按劍恐怒嗔

顧橫波墨蘭後有龔芝麓跋語

分明九畹寫靈均解佩如要洛水濱異代尙書雙合璧趙
文敏有管夫人

老大風流擅畫眉墨花悟入折釵枝梅村不遂東山隱枉
及文青未嫁時

久雨

十日連風雨山城響竹雞蝸都緣壁上馬不到門嘶衰柳
銷金線殘荷倒箭韋積唐成獨醉秋氣滿庭階

詹園叟贈墨

昔聞製墨推廷珪在南爲李北爲奚易水張遇屈第二潘
朱崛起爭昂低黟山松明妙天下龍文刻脊麝吐膺詹園
老叟本歛法螭蚓詰屈加品題元霜夜搗十萬杵星火迸
出驚烏嘯金鼇握手索詩句解道河聲流向西袖懷圓規
比珙璧蝦蟇蝕盡月魄黧金相玉質善養晦正士在野全
天倪叟言寶玦贈俠士藉以吐氣干雲霓愧不能殿前作
賦動天子濡染宮錦翔金闥又不能馬上草檄諭邊徼毛

穎縛賊如縛雞竈煙冷落對破甌硯田枯旱成荒畦知白
守黑報嘉貺秋水連天註馬蹏

觀葉旬卿

脩昌

畫花卉

國朝畫手專寫生前有南田後西谷相公富貴天人姿暉
生雲水披巾幅山林臺閣擅無雙汝起兼之遂鼎足天寒
日暮倚修竹絳羅紅紗罩白玉梅妃複壁掩殘粧太眞溫
泉出新浴一時春露換秋霜倏見夏蟲槁冬木老去蕭孌
卸舞衣遠嫁王嬙泣胡服沒骨寫意體俱工點葉鉤花巧
且速自跨周郎周之冕盡三派徐熙黃荃步難獨妙奪化機
開四時花神含笑木妖哭世人貌襲甌香館或得贗本摹

常熟祇如辰州遲太守

遲端

筆鬪豔姬炫俗目小雪浪齋

句卿

齋名風日妍看汝矴牋雲錦簇喧然禽鳥誤入簾噙香爭上
枝頭宿雖無金釵列兩行徑須明珠聘十斛此後園林脫
繁柯尋春夢到汝書屋

余未識桐城劉孟塗

開

荷寄詩文集報謝

皖公城暮花柳空誰賡白雪迴春風我坐越王臺上石仰
看星斗貫長虹江南勢已江北隔更阻海漚無由通六合
賴有元氣在來往萬里惟鴻濛劉侯蝸居皖城側象罔元
珠冥索得早師惜抱溯淵源筆意宛能海峯逼徐陵小試
書記才杜甫暫屈諸侯客論兵使劒舞甘蔗痛飲狂歌拓

金戟蟻慕羊羶遠相及惜我愈憐君自惜前朝王

子衡鄭谷少

生異方神交原不藉相識六經百家譬觀海細大龍蝦恣
遊息嘗欲牛鐸調黃鐘恥向焦薪合琴瑟持狹願奢知不
償百年未待再經歷餽啜糟粕收半功古有賢聖誰能中
寒蟲織秋謝炎夏俗耳不入輒驚訝此心沈寂觀物化不
才甘邀斧斤赦皖江蒼茫接天地越海蕭寥流日夜劉侯
未老定相逢料理扁舟待東下

江城如畫樓聽松

道人縛茆庵粗就更起危樓壓孤岫遠取山川作眼界時
獻風月爲客壽墨雲如蓋摩層岷澗雨壑雷響當畫諦觀

午日繫高空何處青蒼有罅漏道人笑說幻生魔審是蒼
髯學龍鬬收視斂聽道心沈返虛入渾天體舊依然萬象
復其所安得一廬向此僦飲茶既多詩與清看竹未成筍
可呪他時霜落再登樓結歲寒盟想堅瘦

初夏

初夏觀物變漸知長養心雷聲伸竹節雨力展蕉陰暄暖
果木秀扶疏廬宇深吾生得所遂睨睨弄時禽

大雷雨

一震威如此風雲倏變更堂帷翻燕雀井幕捲魚龍澤國
原通海山城不見峯頗愁漂麥盡生計困三農

日晏

日晏客行倦欲投溪上
扉飢鴉爭葉噪流水抱邨歸古寺
荒無主野花開自肥人家鬱前望逆旅向誰依

少年行

埋名燕市酒壚旁車馬勞君拜北堂
一語許酬三尺劍奉觴壽母意徬徨

呈高雨農先生

澍然

澗壑養幽姿辭官早歸病藥階任紅翻霜幹獨冷靜爲雲
不出山潤物意輒永嘗聞烏君巖靈秀惜伏屏麝有臍自
香虎以文故炳維閩七聚落講學數項領後生荒典籍十

事罕一省不鄙久羸瓶引與汲修綆微瀾何時闊新雨過
廢井膾鮮漁藝苑蒐材獵蘭省山城收夜市催送月墮嶺
啾唧蝙蝠聲雙對壁釭影

曹懷樸先生

謹縣齋譙飲

訟庭晝靜一事無使君治庖召吾徒使君何能一事無今
歌五袴昔無襦炎官火繖張天衢望日汗走病渴烏寒冰
置盤蠅蚊驅中陳水菜雜山膚酒必上尊饌下廚門生厭
飫師歡娛大兒捧觴前走趨小兒獻果後囁嚅使君半醉
撚髭鬚惜少繞涿諸毛居公云吾貌枯少鬚於相法不宜有子豈弟宜民天
所祐體幹未用相賢愚甘雨滿缶豚魚孚自使君至澤隨

車萬家飲之逾醅醕南山爲壽詩非誣

夾竹桃開侍懷樸先生飲

時聞高論起侯芭又值尊開放晚衙圍坐青燈扶白髮傳
觴竹葉舞桃花挾經微義尋精髓說士餘芬溢齒牙甚辱
先生今夕雅少年如日恐西斜

月夜集板橋水閣代送何六杰夫

冠英

兼懷亨甫

碧水錦鴛鴦遊戲出復沒終朝明鏡裏看掠烏絲髮竝命
羨禽魚託根弱蘿葛綺疏結煙霧瑤瑟彈華月今月卽古
月夜夜挂簾鉤新謹逐故謹冉冉下揚州宛轉廿四橋徘徊
十二樓誠知他鄉樂不解離人愁張籍久遠別何遜復

清游欲贈黃金羈手自絡轡頭馬蹏恨不方車軸轉以周
鵠雞帶霜號日出海城早銀燭跋猶長玉枕扶更倒在天
願明月在地願青草草青染君袍月明似儂好

鰲峯講堂追懷陳葦仁先生二十韻

俗學迷榛莽羣材困墊淤六經荒菽粟一硯力耘耔問業
河汾晚尋源賈鄭初振聾徇木鐸正繆指金車十郡張帷
幄三山大獵漁斯文司馬望潤色女牛墟掘鼯鳴皆噤波
瀾闊有餘不當弟子列與對古人書憶撥秦灰燼身登漢
石渠九邱歸補綴四庫許分儲健筆翻鸚鵡名流領鯽魚
時於焦尾聽猥有出頭譽抗手追耆舊談心伏里閭世途

甘坎凜神力屢吹噓鹿洞生荆杞鷺湖久沮洳鷗鄉留講
席鼇阜踞精廬嶺色連諸粵秋聲接二徐假年無過矣請
禱果非歟運際龍蛇厄妖難鵬鳥除槩鉛他日補絲竹後
堂虛天未昌吾道余應老索居開門又風雪獨立影蕭疏

秋夜風雨讀張亨甫寄同王子壽

柏心

漢皋酬唱詩

感成三十韻

大雅久淪落余懷屬杳冥江湖秋易老風雨夜難聽曠邈
望山海蕭閒獨晦暝雲霄欲超忽今古幾精靈世變橫汗
潦年時混渭涇登場具冠冕畫壁唱優伶傳鉢無眞諦元
關已固局鷄鵠饗鐘鼓麟鳳遁郊坰不有扶輪手應遭獻

璞荆張王工樂府
枚馬合明廷
漢水流孤艇
嚴灘接客星
雲連衡嶽
白山斷武昌
青意向排空
闊篇成見典
型關河鬱存想
吳楚各飄零
似爾身仍賤
前賢目未瞑
謫仙甘死醉
漁父誤謀醒
稍慰聯韓孟
非同避尹邢
引鍼投舊芥
磨劍發新硎
書就逢迴雁
光遙逐聚螢
披圖惜騷衷
解佩憶娉婷
此夕低天漢
微波夢洞庭
打門紛落葉
遠漲極滄溟
蓬藁安恆況
津梁問素經
男兒寬作達
客子賴居停
一昔扁舟別
三餘六籍飭
輕拋虛牝日
兀守草元亭
何太積唐甚
全消骯髒形
猶思鵬奮翼
自愛鶴梳翎
吾輩關騷教
羣公讓鼎銘
乾坤信逆旅
去住總浮萍

中秋縣齋賞月歸而病作

天借玻瓈盆滿斟瀛洲玉張口誤吸吞蝦蟇食我腹良會
成跌蹉一卮久不覆欲遂歸山邱生未居華屋朝吟典衣
詩暮削乞食牘吾筆儻受污此疾甚於篤充飢採野蒿就
枕轉圓木百年會有盡奚取萬事足竝時賞月人何處傾
醺醪破牖窺南山獲天寄心目

館瓊水李氏園遣懷

丁酉

鴻雁謀稻梁飛棲固無端我生如蓬梗飄泊隨風湍六年
三徙館筆硯未嘗安老母隔城邑苦夢兒饑寒天親割摯
愛貧賤萬事難風浴始來茲霜露倏已團賴有弟子賢文

史相娛謹園林稍清曠結榭臨江干起行寫鬱紆思采南
陔蘭忽見尾畢逋索哺鳴井闌歲時不歸省疇奉慈闈餐
禽鳥尙知養愧念摧心肝

登江城如畫樓同翁蕙卿

時穉

茂才懷亨甫

蕭蕭風轉松冥冥花入霧
峯堯青蓮宇春靄斂將暮
城堞雨初晴原野煙相赴
茲樓最高曠遠見臨水渡
川光合嵐氣日落爭吞吐
舉酒送飛鴻杳與歸雲度
眷言海嶽謹愴斷薊門路
登覽豈無儔聚散倏今故
草綠又天涯鶯囀不能住
明月識君心留挂娑羅樹

謝陳荔瓶孝廉

國琦

寄酒

有情建溪水東赴閩江湓故人緣溪住乘流寄一歛玉釭
故人面對酒想依稀所寄非糟粕六籍咀華滋明月海上
來照覆手中卮口譙清光入槎枒森桂枝夢持月斧者雕
琢我肝脾腹大挺蝦蟇七寶嵌腰圍山河納其影雲霞挾
以飛醒墮世網閒春蠶縛繭絲猶成五色組可製萬戶衣
恐遭素女妬倏忽朱顏移故人有靈藥嘉惠請再施江水
不復返溪花長芳菲

越王臺遠眺

置酒臨高臺蒼茫想霸才地窮吳越盡國自漢秦開到海
星辰溼連山風雨來浩歌問漁父爾豈釣龍迴

王照人先生

以鑑

過訪余母爲治饌留飯題壁而去

殺雞奉母愧無餘截髮留賓意晏如
暫屈先生粗糲飯與揮大令練裙書
墨雲半壁雨花溼午日一牕風竹疏
似向臨池憐畫荻草元許載問奇車

泛舟赴蕙卿飲雪禪水閣

金尊玉管斗十千載妓隨波任醉眠
世無高岑共嘯傲狂甚開寶李謫仙
越王臺下水黏天中有皓齒含春妍
桃根桃葉誰與渡喚我同盪石城煙
中流容裔清興發手指蛾眉掃秋月
秋月挂在珠簾鉤推琵琶彈素秋迴
風捲雪作花舞片片落水紛浮鷗昔
年歡笑越臺客賸我與汝酣

今夕騎鯨千載去不還那得江湖不頭白

許不棄大松障懸屋壁三世矣爲偷兒竊去系以詩
南山老松夭矯一千丈我家破屋突兀三百年盤拏奮鱗
鬣噴沫挂屋椽神物厭貧不肯住撐出壞堵驀越歸青天
蛛懸蝸絲罨半壁坐令漏痕釵股黯無色諸父昔有言往
者許生側巾大醉撼鐵門括蒼煙煤索大硯手點墨鴉雨
注盆我祖攬衣旁睨恣盤礴森然紙上滿鬱之而痕平明
山僧至咄咄報怪事巔崖一夕拔空青岑削三峯減蒼翠
移山轉海有神力白日畫堂走魑魅諸父卬角倏髯髯我
祖道貌無由瞻許生理筆亦成塚惟松不畏風霜添兒孫

敬作耆宿看彭明氣骨何尊嚴遺笏無存抱硯泣憶昨哦
松衣袖溼萬籟尋聲夜杳然參旗高偃風旛立

戲李望溪茂才

慕鑒

臨東坡山谷書

戊戌

咄咄無虞逼右軍宗風李衛故超羣書家數到蘇黃盡滄
海橫流又遇君

大字能摹瘞鶴銘眞行偶帶墨豬形九原米蔡應相妒出
入顏陶有典型

寒食遊城南飲葉氏園

禁煙乞火未爲狂選勝城南挈榼忙春到榕城百六日鴉
嘯烏柏十三行市聲漸遠錫簫永水厄難逃酒椀香光祿

臺前乘醉興大書巖石似顛張

陽岐江

海門遠送早潮青
載酒橫江惜獨醒
三十六峯正風雪
披簑誰與臥滄溟

贈沈桐士

紹九

沈郎家計四立壁
兀擁圖書傲不貧
醉眼垂青竹林友
緇衣染素洛陽塵
誰能倒海撈明月
惟合渡江采白蘋
我故蓬蒿甘沒首
問君何事笑相親

家勿邨修撰

鴻年

偕高螺洲編修奉使琉球將抵福

州過柔遠驛觀夷官習禮賦四十韻

十八年六月

龍飛紀道光四森成帶礪一介達梯航

告計邦惟舊

褒封慶未央詞垣三殿選驛埃百蠻鄉

雨露霑

新寵雲霞照大荒北來經析木東攬極扶桑

蕩涵

仁風遠崢嶸正朔長占星到牛女建國溯人皇

怪誕存君祝傳聞略宋唐輸誠洪永代鎮撫按司置

章廟榮冠帶球陽篤保障周廷通象譯漢詔播炎方至

德無矜伐嚴威自肅將五朝今繼

聖七葉更遐昌

國自尚質受

賤子家閭嶠來賓觀越裳鮫綃時有贈鯢

戶事能詳羣盜連滄海邊藩昔陸梁波臣脩職貢

天語錫輝煌七事吾宗擅

康熙二十二年林舍人麟燭奉使上七事疏

三山世

鑑揚我

皇紹

休烈侍從盡才良受錄膺神器

朝宗列島王八城開馬市五嶺度龍驤早值兵皆偃猶思
澤普洋

璽書勞賻唁旌節慰存亡品秩加華服官儀

具太常輶車推二妙蓬頂領羣芳焜耀相如里經營陸賈
裝幢幡甘蔗影帟幕荔支香詭麗歸墟處瑰奇巨壑藏雞
籠望空闊馬齒接微茫閒歲臺江渡乘風海舶颺輶軒雜
鳥語玳瑁半倭粧馴擾諳情性雍容習典章璫瑜排綵仗
韎韐儼戎行想像輶軒降親臨黼黻旁教忠端治本延

賞協嘉祥鍼路麟洲轉更程鱗水量

海道六十里爲一更

百靈丹

簡護五兩錦颿張北極瞻樞斗南瀛貢筐筐大清千萬禩

與爾固金湯

分詠得三高祠

己亥

弓鳥留箴種大夫上將軍已變陶朱五湖買得扁舟後越國江山不屬吳

霜清故國冷漁磯菰菜鱸魚正美肥較勝華亭思鶴唳布帆無恙獨東歸

鋤田飼鴨養天機春水環生甫里祠憶自風流傾郡守人間傳徧木蘭詩

同蕙卿聽秋史彈琴

天風蕭寥開軒楹一輪明月孤桐橫蟲鳥盡瘖木葉脫大

蟹徐行沙暗撥此時有絃若無絃三峽隱隱聞流泉不知
入海幾千里轉舵楊颿秋雁起一土據牀雨據几兀如定
僧萬緣死聖處工夫妙不言禪宗清淨合元理我能出虛
聲無聲君倏得道指非指反思昨夜調箏琶蕩子不歸女
無家渺所思今天之涯

渡虎門歌

虎門萬里空斜日一颿搭江風忽挾海雨來白浪高壓摩
星塔遙聞虎嘯聲響答幸脫虎口氣匝匝九天之雲盡下
垂母乃海欲將江納有長鯨橫亘若雪山晉萬古白骨齟
齬閒天旋地軸轉千載人闔鬼門爭一關舟輕木葉舞浪

急蛟龍怒蛟龍慎勿怒忠信絕恐怖人心險於滄海波掉
臂游行已飛渡何況十洲三島不死之藥仙許遇吾欲黿
鼈跨爲梁躡足青溟撥雲霧下視虎頭五點小如螺流虬
盤作蠓蛭附蟻垤貉邱安足顧

小軒梅花開喜家獻雲暮過

春光與人無厚薄昨到貧家點綴來流泉涓涓瀉白石青
烏恰恰嘯蒼苔溫風晴日次第送水邊籬落橫斜開東君
有意嫁桃杏先遣梅花价作媒綽約靜姝色獨正冰雪其
姿天地性信知綺麗未足珍幽掩蓬蒿詎非命慰藉寂寥
有詩在斟酌陽和惟酒聖故人如月肯照臨劇談痛飲盡

斗柄一枝攀折最高寒三徑荒涼帶冷酸友韻於花已清
絕花成吾友真古歡雖無齊奴錦步障不用羯鼓學阿瞞
明朝懸釜且勿問須放螺盃滄海寬君不見滿地煙痕如
水浸有鶴同眠石可枕

獻雲喜談兵海內承平久矣獻其策於大府不能用
贈詩以慰之

南山乳於菟食牛露頭角風雲未際會聲已噤豕豹君家
世材武才可奮文學焚棄腐儒巾將印欲手捋抵掌謁公
卿少年儼河朔棋覆東吳圖蔗舞建安稍捫蝨非其時談
虎厭所愕嘗徧五侯鯖味與蠟同嚼以我爲水鏡胸能鑒

清濁破帽風雨欹緇衣塵土撲到門候欲春楊柳秀擢擢
胸次鎖雷霆笑語落冰雹吾方梁甫吟惜無管與樂攜手
無諸臺江山玉磨琢波浪洵英雄沙石久蝕剝海內厭用
兵武庫朽饒燭木鐸徇路人市廛夢未覺火色終飛揚肉
食多齷齪善讀爾父書纔比不龜藥甚願言不用不願聞
箭髀

登般若臺摹李陽冰篆

海山夜半風雷吼電光搜壁著蝌蚪道人恐怖縮蝟毛手
不敢捫呪以口三十六峯無恙青但見一峯揭若斗蛇邦
更阻越會稽螺書未鑱禹岫樓歐陽集古錄不到蒼頡銜

寃積欲剖化身降爲李少監潤色閩荒作文藪長楸飛鞚
騏驥渴快劒脫鞵蛟螭走尊彝在庭考鼓鐘袞冕立朝列
冠綬春風楊柳垂華滋秋水芙蓉淨塵垢乍如執穗蟹負
筐蔚然棲梧鳳離轂諦觀入石直無筆石外筆前勢圓厚
垂筋略參子玉法倒釵徑出相斯右苔織薛繡白斑爛雨
淋日炙增堅黝我初似觀碧落碑下馬布氊坐忘久縉雲
學與軒轅祠持較揮毫孰先後願奢力薄遠莫致得此亦
足光蓬牖二十四氣備中和一一元珠從領受摹歸吞篆
夢登臺海山蒼蒼盡吾有

過積翠寺未入客堂遂返

人語閉深院似防俗客來
楸枰紛落雹茶鼎過鳴雷
松意入山靜花心冒日開
聲聞卽禪學不待見僧回

過黃樓

往時窮巷一茅茨日有侯芭過
問奇嘗造元龍樓百尺深
談黃蠟夜三枝燕泥落瓣尋前壘
蛛網粘花掩故帷悵望斜陽明
滅裏危簷猶向短牆支

寄亨甫遊松寥閣

爾跨綵雲去長橋欲架天
昔遊追李白獨往遇焦仙
海角催朝旭江鐘落暮煙
空山無甲子自憶漢唐年

黃鵠山人詩初鈔卷二

閩縣 林壽圖 穎叔

古今體詩六十首

春日鄭氏園示諸子 庚子

餬口謀舌耕計出糲糲下舍已就人耘藝圃事撙撙反哺
不如烏流光駛於馬昔歸鴻返塞昨來燕及社念母久丸
熊教子每封鮓以茲文字傭恥較升斗寡主賢亭館幽花
秀竹石野賃同伯鸞庶芑作少陵厦晝長俗事無圍坐聽
咿啞百家穀核陳六經瓶水瀉我惟溫腹書耳入心與寫
願修鑪火功金鐵鍛大冶賣菜非求益采菊欲盈把敢乘

春服成風浴偕冠者

讀書

讀書古人死糟粕未傳心如井汲修綆無弦張古琴鳴雞
逢雨晦夢蝶入花深忽自仰天笑皓然月在林

梅卿留宿二首

日影午射地雞在樹陰號渴憩道旁舍求漿正煩勞隔水
報君家鼓楫迎漁舸來數足音熟帖耳犬不嗥登堂先拜
母牽裾列兒曹喚婦取爨火向鄰借甕醪烹香炙山雀炊
玉羹溪毛門無僕與傭舉室十指操深談盡晷漏情真至
語叨我亦忘是客瀹泉助煎膏所媿行僕僕相累家騷騷

惟祝禾黍豐分餉及豚羔

燭炮客就枕主婦先鴉興海日如沸釜甑氣已雲蒸大男
讀魯論背壁留殘燈次男學把筆書家貌行蠅借問塾師
誰詩禮訓自承最小縛短帚埽塵近匡繩搖手戒兄讀恐
驚其父朋推被笑語之樂豈在曲肱盥洗用湯盤日新吾
可能聖學五倫畢善氣一家凝何爲棄骨肉托鉢同齋僧

石倉園

撰述根忠孝本盛枝葉舉蟠結不朽實神鬼陰呵護閉門
築名園廣畝蔭嘉樹植自著書年及見改天步樵采九州
勝弋獵萬卷數儒藏未手鐫國難遽身赴崛起十子後盛

有六朝句變楚恥鼃蛙扶唐奏韶護追歡森閣遊慨動吳
鄉慕水次一山凸泉聲終日語明月照還秋疏鐘晚來渡
沈野瑁環歸陳生愴蒿露孤鶴入蘆花老賸吾古度芬華
仗節操歲久不凋蠹匪愛屋及烏固以主人故吳蒙嘲閤
派騷壇竊雄據淮南大爭噪鼎湖龍獨去試過拂水莊冷
於淇塘路孰扶大雅輪名豈文章著

秋夜蕙卿枉過

葉疏未及風微霜零已脫節候固使然本性良易奪鳳皇
不來棲巢窟族鵠鵠何如澗底松惟互石上葛薄質昧堅
貞乘化託曠達不待葉落辰華發實早撥君良歲寒朋元

氣默旋幹吐腸出百怪溟漲筆力闢明珠沈濁泥俗目無
由刮超騰可萬里我行追鰲鼉冷淘越井泉細碾建溪月
天籟送風簫生意鑪火活破鏡挂缺枝清簣刻詩骨無人
造幽境領略燭至跋非魚感知魚江湖兩濡沫勿爲逞姿
媚眾愛願盡割

舟次逢亨甫赴板橋水閣

並船握手魚出瞰笑語未終風解纜苦竹黃蘆瑟瑟秋江
動雲移去帆暗女郎水柵開酒壚待君往唱山鷓鴣我自
朗吟袁虎曲牛渚月明來運租

臺江詞

君家潮到妾家遲
妾見潮生月上時
妾自候潮君弄月
願潮無落月無虧

雙江如鏡抱臺開
照見鴛鴦雙影偎
臺上天連臺下水
玉簫按遶彩雲來

送楊翠巖

維屏

還揚州

鴈抹橫雲使風力
夜色明當霜月白
入門聞奏別鶴聲
知有廣陵憶歸客
罷琴進酒未滿杯
掣作鷹飛欲奮翼
青山萬仞疊成愁
黃花一籬秋可惜
楊侯年少氣高
清大河前橫華嶽
擘裁詩愛倩雛鬟
歌兼絲竹肉韻金
石能柔灌夫役使
奴不忝太尉系之
嫡窮愁著書坐繭
窠惟汝五色解

纒織久從吳語習阿蒙難得越吟對莊舄故鄉無家家他
鄉今夕不飲飲何夕迺翁昔棄九州伯時清不用治安策
兒孫看月戀揚州選文因傍蕭梁宅活民濟世有政譜汝
猶自今列朝籍莫貪禪智營墓田但載西施混湖澤稍聞
海上秋潮興萬弩乘風縱蕃舶胡不歸取平蠻書上獻

天子贊破敵平遠臺鐫第二碑敢量才非參軍戚功業
如成早寄音賀觴迎汝三山驛

蕙卿秋試報罷重陽後一日再登越王臺三十韻

自古有秋士易興搖落悲與才天獨厚遇合數偏奇元理
冥難測恆情賤見疑神魚遲變化相馬失權奇品到羣空

冀鳴當瑞應岐翁侯鍾海嶽造物運鑪錘早歲騷壇擅專
門奧窺窺六朝卑體格四始備聲詩卓犖今無對崢嶸昔
並馳抗懷前輩往慧業後身誰絕代傾城國中原將鼓旗
羣雄容虎視眾女讓蛾眉生長閩荒舊先圖漢郡貽江山
飾文藻草木洗蠻夷海內此臺古雲端幾輩攜其追戲馬
宴重拂釣龍絲昨日雙鞭鐙西風一酒卮花徇萸菊笑柳
受棗饒給似子羞毛遂無人說項斯苦穿維翰硯屢閉仲
舒帷坐月琴橫膝干虹劒挂眉元珠搜象罔靈鑰抱金匙
楊柳枯蟬甲梧桐老鳳枝醉濡題柱筆狂發問天辭蝶弄
寒香瘦蛩隨急景移名區嗟宛在野色暮淒其互答孫登

嘯渾忘原憲飢狂奴存故態佳節續前期疊嶂陰嵐出滄
江落照宜但傷臨眺地屈宋不同時

過慶城寺適太守迎春至

辛丑

梵宇緇經地問僧今底忙郡人春乞土節度昔開臺鳥助
笙歌韻花分綵仗光甘棠有遺愛獨立頌琳琅

夜聞風作諺謂催花風也東同學諸子

春半園林雪未鬆不禁寒氣困疏慵東風一夜弄桃李暖
日明朝喧蝶蜂茗盃安排供永晝花燭招展待芳鐘欣欣
生意天所與定有朋儕來負節

宋侗菴上舍

任隸書歌

宋侯初亦混城市廣搜汲豕補缺亡擔夫爭道悟筆勢古
肥今瘦評鍾王老由章草入隸佐跨有秦漢卑隋唐退居
村落避塵垢寶惜墨汁咀金漿世人奴視程下邳曾未夢
見蔡中郎試令指畫大象體望燭吐穗疑星芒宋侯十年
不履闕頗似元岑幽雲陽許我夢英解偏旁與辨八分寫
三蒼鳥已分蟲魚捨鳳蟲腳俄舒鵠頭昂層雲冠山臺宇
峻庭燎飛煙鍾簾張織波濃點忽錯落酌劑文質合周商
俗書崇尙黃門令祇學急就趨凡將政如蛾眉妬眾女故
應棄置房中藏請君長毫埽秋勁爲展隼尾排風霜他日
臨池無筆法結想重上君子堂

送秋史赴浦城

六百江程三百灘沿灘西沂夏多寒儻乘江水思東下一
日山城見未難

訪花

三分暖帶二分寒欲縱花開似作難頗喜春風工養氣半
開花始耐人看

自嘲

腰瘦安能載五車苦將肝肺飼蟲魚秋桐半死和琴瑟春
雪連根飽菜蔬一晝未開原有易三墳以上讀何書不曾
欹枕惟航坐亦恐邊韶笑弗如

言告山人言石金卷二
雨後過開元寺

飛雨海上來曉寒闕城闕迴風送蕭瑟繁響遞泉窟溼雲
暝不已去鳥起復沒午煙忽破霽一徑出林樾幽居鄰梵
宮獨往尋唐碣鐘聲在寒碧靜與花氣發殘僧話故王興
廢成倏忽借君松間石待看古時月

過李二郊居

出郭失炎暑引堰爲陂塘種竹不論竿繞舍皆修篁幽人
能卜築止客來納涼心如五絃靜鳥語諧宮商美蔭坐晴
簾清吟遞瓊觴芰荷晚來開遠送流水香出門看山翠過
雨明殘陽笑指子真谷偕隱何時忘

遊塔湖宿妙峯寺

大江送我東白日送我西東西我無役榜子問所棲遊心
百年內虛舟乘天倪羣動旣以息物我理與齊暝色塔上
來下壓湖雲低孤峯若高士昂首招攀躋危橋躡飛空飲
水浮雌霓明蟾出其罅呼吸珠探驪我如武陵漁暫往桃
花谿宿桑不須戀明發催晨雞

爲董蕙纓茂才

顧設疏酒

宰相萬錢愁下箸太常終歲耽長齋嗜肥擇瘦各無賴矯
揉物性戕天倪寒士食籍古有註不必斷葷可茹素花飛
越城董生來惋惜落紅散香霧楊柳絲貫榆莢錢春光價

賒酒十千滿庭禽鳥朋友語似勸當杯兩少年夢羊觸蔬
臈神怪先烹雀舌通儂介萬釘菰菌雷初拔雙臂壺瓜雨
未敗請拗鵝項解鼈甲雜嚼玉齏飲金薤二十七品入胃
腸方寸納盡須彌芥我聞靈均夕餐但秋菊又聞平原晝
起惟食粥一盂四簋得共嘗幸免飢寒願良足何況潤以
瀛洲膏和氣如春實空腹醞釀仁精與義熟董生董生勿
厭貧販蔥豈任梁公卿百年消散三百瓮較食熊蟠誰重
輕

淡水捷聞寄呈懷璞先生

壬寅

雁遞霜警秋鷹擊風搏高城頭暮吹角萬井動蕭騷抱膝

吟梁甫壁蟲咎夜哦擎蓋塞衢術誰分黃屋勞澎湖對
厦島惡蛟闖巨濤淡水臺北戶門鍵局何牢丞尉卑秩耳
升斗念竊叨七百里方圍仁氣結春膏人和理可恃地利
勢兼操未煩帥府檄狙伏伺漁舫火輪雖有機我運心兵
廔捷聞詫智勇小割聊牛刀民遵孝經訓公每教民讀孝經臨敵
恥先逃迺知學道力足以制桀驚不才瓴甌賤在治昔受
陶與談天下事頗獎少年豪觀窗短駒影埋冢禿魏臺去
隨龍伯釣跨海連六鼈

夜過松風堂

婆娑老樹話南遷但見秋清水極天遠火漁多僧獨坐大

江風定月中懸蒼龍蛻委禪棲後朱鳥魂銷落葉前借與
蒲團祛世慮不知換却是何年

過蒙泉山館試茶

蠻鄉斥鹵水味惡龍困於泥井復涸碾芽欲試旗與鎗百
錢一掬老鴉壑遠思羊酪救渴羌未慣腐儒藜藿腸街頭
火雲氣蒸釜灼舌斷津背流漿涓涓分從烏石派一勺能
收滄海隘雖欠玉盤捧蛾眉亦把銀瓶賞螺黛城南尺咫
塵障空左右竹木交以風濡頭但作酩酊飲怪唐至今無
盧仝黃封賜餅不到我餉自武彝用活火天漢微瀾有卷
舒江湖過雨終貼妥肚腸於世百不宜斟酌大雅俗其醫

更邀同志二三子早晚聽泉來賦詩

贈謝碩甫孝廉

宗本

及其弟樵雲明經

宗善

謝公宰樹拱音響振木鐸虎豹隱雲霧深錮南山壑遺體
猶斑斑諸郎競頭角去棹孝廉船歸夢候伯幕被服甚都
雅脩飾非容貌羣公倒屣意端以承家學惠連嬾靈運珠
玉相間作聯牀風雨酣尋夢池塘樂鸞鳳方與翔騏驎不
終縛翰墨技之餘賢者偶有託顧於對文楸謬容一子著
矯矯六國秦母形韓魏弱明星秋粲天夜炤飛螢燭正當
霜露清繁葉盡刊落適然會我心萬籟靜街橐知從誰氏
遊華燈縱歡酌

中秋誌感

年年翫月愛秋中
今夕中秋月不同
榕葉山城天半霧
桂華亭榭夜西風
銜哀海上惟精衛
伺影人間幾射工
會使蝦蟇終腹裂
清輝萬里展晴空

病起園庭木葉已脫

我初未病物態妍
春氣暄晴果木動
芽蘗盡放錦斑斕
香霧城南簇騎從
閒拋書帙騁和暢
隨意酒盃寫豪縱
相逢絕色笑城傾
不令佳麗怨房空
朝華夕秀博歡娛
客燕賓鴻忘迎送
澹泊世緣百不求
倚恃邱山一身重
頑健想邀天地慈
疏狂竟受鬼神弄
六時寒暑轉氣候
冰炭腸中一

鱸閨子輿臥疾至跼蹐累月抱衾看屋棟眼無蜂蝶耳有
蟲大似醯雞困芻蕘門前故人杳足楚枕上舊書獨腹頌
學業失時類惰農萬頃湖田塞蕪葑又如橘蠹與桃蟲剝
蝕文理賸空洞昨來飯香漸入鼻生氣初萌可灌種屏除
藥餌鍊心丹謝卻庸醫息聚訟偶追前游憶城南破帽蹇
驢出馳鞚蕭蕭雨屐踏秋風寂寂鳥絃散春哢撐霄枝幹
瘦無陰臥地莓苔冷如夢迴思粉絮堆作團亂點胭脂密
無縫習知滿樹鬬芳菲卽是過冬守寒凍木枯再盛見有
時髮白不元老何用悲秋宋玉伴吟蛩罷賦子雲枉吐鳳
古今榮悴理難齊旦暮雪霜寒易中花能魂返我病蘇百

鐘不辭飲至痛

賦得黃鶴樓寄松寥山人

禍衡鸚鵡空能賦李白鯨魚未可尋
安穩惟騎黃鶴背高
空獨縱鐵龍吟岳陽秋色橫吳楚
漢上浮雲變古今迴首
衣冠盡邱隴請攜酒與老仙斟

雪禪席上飲蒲桃酒

文園詞客渴成枯
乞得流霞卓氏壺
漢使未馳大宛馬
輪臺想吸月輪孤

霜沾馬乳帶邊愁
撥動琵琶寫素秋
信有溫柔鄉可老
不將五斗博涼州

六言送中山金紫大夫向使君朝賀元旦

丹鳳雲中 帝闕流虬海外神山元日表隨萬國隔年春
到百蠻驛路梅花雪放 御河楊柳煙寒歸時穩乘黿背
羨汝省識 龍顏

贈柳訥菴徵君

癸卯

陶潛八十日辭官君更羞彈一日冠料理琴書教子弟蔚
然松菊並高寒

眼空當代識英雄久卻諸侯聘未通獨友布衣許龍鳳造
廬端合拜龐公

曉讀

夜夢見古人既覺墮冥漠追尋所著書傳者亦糟粕浮萍
無根蒂游絲無繫著非用竭顏力安得覩孔卓大道久陸
沈淵海採眾博先儒志六經未害百家駁趙宋日中天雲
霧披豁落西漢揭斗杓星采已璀璨黃河雜沙石源遠流
混濁誰能澄使清浩瀚溯泉壑迂士薄經生虎豹愛其鄰
風會有轉移學校競穿鑿始以誚空疏久迺甘剽掠彼蠻
此亦觸苦鬪蝸牛角杜史注道德尼山兼筆削斯文固在
茲精意中何託平旦氣清明掩卷與領略射的挽萬鈞弩
勁嗟矢弱

晚春簡同門諸子

花柳困晝長蜂蝶撩春短爛熳迷所歸物性貪趁暖步襪
何處嬉乘簡結繡伴山川狀妙麗庭院安蕭散風簾時鳥
聲嘲弄絃與管游絲裊晴旭有此機尺纂亦釀玉餅成思
注金荷滿衿衣頗宜人巾履日就嬾往時從曹公懷璞先生授
粲其適館斯文有正色豔冶不當眼鼓吹發詩腸湔袞煎
茗盃於今五年別膩垢塞肺脫脫甲臥蒼松落粉抽紫簪
秋實希可俟勿恨穠華晚

蕙卿邀過雪禪飲用前韻

裂冰上河豚綠破蘆芽短舉白弄紅妝間擁花枝暖每發
絲竹哀輒疏風雨伴梁園舊賓客雪盡雲水散買醉夜未

央澆愁春不管俗工製邪幅碎錦可組纂煉石補青天缺
陷何時滿子如餓鴟病我坐眠蠶嬾新知少傾蓋古賢久
捐館不爲按劔瞋尙有橫波眼往從沃內熱新薦蔗漿盃
解繚去世網捶鉤出塵腕與韜燕角弧其縱朔蓬簪春光
許假人歡笑期未晚

答柳訥菴遣二子從學見贈原韻兼柬葉蘭墅

世人用智桔槔深拙我無機如漢陰硯田就荒歲苦旱膚
寸難起泰山霖會稽男子驕婦女嘗駕駟馬驅載駿薦身
邑子取封拜揚眉豈必賢結瘖餓夫守死恥一飯義士逃
名薄千金青天孤縱冥鴻翼蒼澗甘老伏龍吟無諸城北

春帶露百無一事可賞心歌聲激楚動柳惺獨請扣筋酬
捶琴草元清淨至投閣自古大道嗟陸沈紛紛耳目貴所
賤久潛周鼎爨土鶯辱遣侯芭問奇字字奇敢許人摹臨
南鄰葉翁頗傑出爲我送抱君推襟煙生藍田晚得玉雙
璧琢之皆貢琛胸懷坦蕩與披豁不種荆棘無嶮嶇鵠雛
伏卵大於石雞欲啄抱力弗任謂言餘潤丐沾漑祇向東
海分蹠涔推藏笑絆萬里足文采解憐五色禽劇愁雲霧
若可撥夜有光氣干奎參

偕薩樹堂宿陳亦香齋中食蟹幼農復訂賞菊

饒想吞江湖胸次有溟海望邀飲及卯况值日剛亥薩子

豪文章長卿生蜀再能從下榻眠不招投轄罪玉盤堆金
膏意氣輪囷在身嗇口得豐快獲監州倍秋風送稻香晚
霜留菊待糟牀注聯珠索醉毋辭每

得張亨甫書期秋捷後同寓松筠菴媿謝其意走筆
寄答

揣摩遊說無一可百憂煎腸逼飢火洛陽大道冠蓋塵萬
古碾成幾蓬顆長樂聽鐘雞未鳴世有高賢夢青瑣長紳
大珮縛殺人當畫更耐揚沙堞昔年計吏徵公車賈生挾
策冠岌岌徘徊間闔高九重北斗但見星辰夥久羈駿馬
金臺空惟作橐駝土室坐燕姬趙女蛾眉青充選房帷皆

矮嬌拋擲弧矢棄路旁墮地爲男悔翦鬢憐槐着黃又上
樹盼桂弄丹欲分朵拂茵落溷各隨緣貴賤未必由因果
長空遠盤雕鶚勢萬里放晴天貼妥幾人彎弓擅穿楊視
蝨如輪期中堞松筠菴中客病臥屏除酒盃親藥裹衣裘
早做不自寒遠持刀尺裁量我卑棲易處頗苦溼健步欲
移奈用跛出門尋轍意遼巡覆子之車炙我輟相思羽翼
附飛鴻南北何時慰虛左

夜次訥菴韻

抱鏡插屋椽鋪霜粲萬瓦一燈靜夜影能鎮百蟲啞淵明
無絃琴本貽同調者自不夢羲皇山水未輕寫泥泥露已

零杞菊香盈把採之佐秋盤翦燭花報地太史明有占少
微星在野

房師李梅生先生

燮鼎

招與高菊屏孝廉

福康

夜飲

劖山拔雲根倒海撈明月龍門讓先登高生早超忽奎文
動斗宿牛女占分越眾星勢參差氣各森溟渤桂宮曩入
夢仙人睨旁伐一枝最高寒次第不我抗

先生云八月十三日薦予卷主

司已擬元二十八日忽抑置第二

辱承國士知食貧久糠覈濡頭今醉髡

蹙足昔憐別漏盡夜沈沈秋過歲忽忽將爲劍南別戀此

鈴下謁

雪後住白雲堂

雪後晴收墟里煙
擴從初地證諸天
空山木落龍蛇蟄
獨夜星涵蚪蚪懸
細字繙經分佛火
晚齋送芋破僧錢
半牀夜裏白雲宿
莫打鐘魚攪靜眠

聽彈平沙落鴈

問誰移櫓楚江隈
霜落沙清去復迴
不是瀟湘明月夜
卻飛二十五絃來

西溪

東山日落照西溪
溪水東流更向西
寺在鐘聲白雲裏
無人深入獨扶藜

雙溪口

水合山圍溪路新沿溪欲泝晚迷津
瀟瀟苦竹日初落滿樹鷓鴣啼向人

延平舟次

惡灘無數晝長昏石與篙爭勢若吞
未半建溪欲頭白浦江西上更愁猿
盤渦隱約動春雷神物千年土不埋
是劍是龍君且置會乘風雨現將來

劍州文信國開府處

胡騎縱橫日窮荒擁戴年義旗空北
指法駕屢南遷嶺嶠功何在樓船事
可憐二王無寸土一旅有孤懸慨想
廬陵

烈遭逢宋室顛六龍航海後萬馬渡江先諸葛紆籌筆苻
堅早擲鞭艱難此開府選辟必英賢鶴唳猶松警狼烽五
木連建麾出樞府用命奮戈鋌地勢荆湘盡軍聲漢廣聯
一時得韓范八寨集蠻蜒孰使行朝潰頻傷士氣孱狼奔
真倉猝烏合亦精堅憶奉勤王詔身甘許國捐崎嶇脫榛
莽道路滿旌旃四鎮謀非拙三宮使未旋朝廷安不戰節
鉞付無權朋友虛忠謇閩甌失鎖鑰麻鞋家室散衣帶古
今傳我曩經柴市因公感木棉湖山供孝養將相擬神仙
塊肉誰存趙頭顱遠人燕悽涼厓水劫慘澹颶風篇酹酒
來茲土精靈倘在天風雲荒故壘城郭抱晴川絕徼鳴鞘

靜崇祠伏臘虔帝鄉望箕尾台宿曜魁躔正氣猶留否斯
人尙凜然招魂行劒外朱鳥降翩翩

明翠閣梅花用東坡松風亭韻

醉楓病柳煙中村溪行歲晏銷羈魂春風不歸客未返但
見匝匝灘容昏劒州近郭巧渲染蒼翠上有祇陀園垂垂
巖花正凝笑迴風舞雪生奇溫翻波斜照動石壁挂樹有
似迎初暎飄零遲暮在驛路爾豈絕意辭蓬門鉤輅格磔
響深碧途旅那忍聽禽言提壺何處可貰酒夜艚招月同
芳尊

夜止觀前被酒晨起獨行將訪漁梁山至夕陽嶺雪

作

山靈知我愛狂遊
戲舞瓊華豁醉眸
一夜銀河吹水裂
千崖玉柱斫冰流
洞天目極無飛鳥
風雪身孤有敝裘
倘許耕煙種瑤草
何須塵劫問苗劉

浦城道上

萬古銷魂地
非關漲綠波
我行南浦晏
獨恨北風多
骨肉音塵阻
才華道路磨
驛亭無好夢
搖筆自悲歌

楓嶺

閩山脫秦刦
南遁羞逐鹿
怪石不受鞭
陀背恣起伏
青蒼剗百蠻
劒戟剗巖腹
鳥道窺中原
吳越競踏蹴
楓杉皆鎖

鑰天設控荒服守險或未然霸圖自傾覆高揭大小竿嶺
名迴風吹慘綠煙墩臥戍旗箭材棄崖竹邊疆無盜警策
蹇去僮僕曠觀形勢雄誰念人代速關吏笑棄襦前行遠
邦族迴首縱高登鄉心附黃鵠

峽口

路過古虹寺疏鐘煙際聞客忙爭落日僧嬾臥閒雲石壁
垂蝸篆山田付鳥耘肩夫指峽樹暮色挂紛紛

過仙霞關四首

盤蛇擲虎走蠻荒絕頂天紆鳥道長雲壓能低雞犬唱星
沈或掩斗牛光白銷澗影餘殘雪青失峯尖早夕陽誰闢

蠶叢談史浩往來從此便琴裝

蘭橈香煙達帝宸漢家穀魄久棲神崢嶸刀石踰關索慘
淡旌旗接李頻泉水出山猿鶴訥僧廬避俗佛仙鄰上方
鐘磬無人聽閒把風光付采薪

日射雄關石扇開海風曾送角聲哀螳車奮臂王鱗島虎
旅摧鋒李泌才亂定山城餘箭箭霜清巖微靜墩臺南天
戰壘閒憑弔颯颯松濤怒壑迴

輿歌聲裏度煙嵐改盡聞音聽越談插漢危峯高壓夢流
霞短旆晚肩輿箬峯屏嶂晴相映梨嶺笙鐘雨尙酣櫟下
劒南俱不見鴻泥幾輩在茆庵

書仙霞嶺劉鐵嶺孝廉

崇慶

題壁詩後

天戈昔東指吹角海雲積
寂寞樓船事銷磨幕府才
和戎原漢策弔古又燕臺
想見書空意磨崖削墨來

清湖除夜六言一首

亂山截斷歸夢急鼓催除舊年路尋故鄉漸遠人守寒燈
不眠幾家牕明崖火五更雪滿湖船起視屠蘇盡矣往追
歟乃蕭然

江郎石

插天芙蓉削三片蓮岳雲連遠莫辨忽披絮帽高探頭負
劒巍然獨冠弁朝日出海光動搖一峯隱躍兩峯變初如

不令植义手巧或尹逢邗羞面須與石縫中裂煙離立往
參筍抽筋怪哉巨靈霹靂壁跟肘旣分目猶眩弟昆荒誕
鯉湖仙孫曾恍惚幔亭譙鐵鎖緣慳斷壁攀金臺起發排
空羨頗聞山靈善隱曜夏積陰霾冬雪霰衡陽九疑望未
真巫山十二數難徧十年芒屨墮塵土三日晴嵐荷神眷
曉梳霞髻開鏡函暮舞霓裳接裾袵金支翠旗事有無駕
鶴驂鸞勢後先江郎若草新宮銘不忝仙才許余薦